

VENDIM
Nr. 931, datë 9.10.2013

**PËR KRIJIMIN E TASK - FORCËS PËR MARRJEN E MASAVE TË NDËRHYRJES
EMERGJENTE PËR MBROJTJEN MJEDISORE DHE REHABILITIMIN E TERRITORIT**

Në mbështetje të nenit 100 të Kushtetutës, me propozimin e Ministrit të Zhvillimit Urban dhe Turizmit dhe të Ministrit të Punëve të Brendshme, Këshilli i Ministrave

VENDOSI:

1. Krijimin e Task - Forcës në nivel kombëtar për marrjen e masave të menjëhershme për mbrojtjen mjedisore dhe rehabilitimin e territorit, e emërtuar "Task - Forca për Mbrojtjen e Territorit".

2. Task - Forca për Mbrojtjen e Territorit drejtohet nga Ministri i Punëve të Brendshme dhe ka në përbërje:

- Ministrin e Zhvillimit Urban dhe Turizmit;
- Ministrin e Mjedisit;
- Ministrin e Transportit dhe Infrastrukturës;
- Ministrin e Kulturës;
- Ministrin e Mbrojtjes;
- Kryeinspektorin e Inspektoratit Ndërtimor e Urbanistik Kombëtar;
- Drejtorin e Përgjithshëm të Agjencisë Kombëtare të Planifikimit të Territorit;
- Drejtorin e Përgjithshëm të Agjencisë së Legalizimit, Urbanizimit dhe Integritetit të Zonave/Ndërtimeve Informale;

- Drejtorin e Përgjithshëm të Policisë së Shtetit.

3. Task - Forca për Mbrojtjen e Territorit ka këto funksione:

a) Analizimin e problematikës së ndërtimit dhe vlerësimin e nevojës për ndërhyrje emergjente, për masa të mbrojtjes në të gjithë territorin, si dhe në veçanti dhe me përparësi në zonat e përcaktuara, si zona të rëndësishme kombëtare, me ligj, akte nënligjore apo me vendim të Këshillit Kombëtar të Territorit (KKT).

b) Evidentimin e zonave me interes kombëtar, në të cilat do të zbatohen masat e ndërhyrjes emergjente për rehabilitimin dhe mbrojtjen mjedisore të territorit.

c) Miratimin projektplanit të veprimit të ndërhyrjeve në këto zona dhe në të gjithë territorin dhe bashkërendimin e punës për zbatimin e tij.

ç) Përcaktimin e përparësive për zbatimin e ndërhyrjeve emergjente në të gjitha zonat dhe objektet, të cilat paraqesin karakteristika të veçanta kulturore, historike, sociale, arsimore, shëndetësore, mjedisore, turistike, industriale apo infrastrukturore etj., mjedisi i të cilave është dëmtuar/shkatërruar nga zhvillimi i ndërtimeve.

d) Përcaktimin e objektivave e të masave për bashkërendimin e punës me organet e qeverisjes vendore dhe me strukturat e tjera, të specializuara, për monitorimin dhe analizimin e problematikës për realizimin e ndërhyrjeve konkrete.

4. Task - Forca për Mbrojtjen e Territorit mbledhet një herë në javë ose në çdo kohë me kërkesë të kryetarit.

5. Në mbledhjet e Task - Forcës për Mbrojtjen e Territorit ftohen të marrin pjesë përfaqësues të organeve të qeverisjes vendore dhe të institucioneve të tjera të interesuara, kur çmohet se pjesëmarrja e tyre do të jetë e vlefshme për përmbushjen e misionit të saj.

6. Kryetari i Task - Forcës për Mbrojtjen e Territorit i raporton pas çdo mbledhjeje Kryeministrit për ecurinë, problematikën e hasura, masat e ndërmarra dhe rezultatet konkrete të arritura. Kryetari i Task - Forcës, me kërkesë të Kryeministrit, raporton pranë Kryeministrit edhe për çështje të veçanta.

7. Task - Forca për Mbrojtjen e Territorit ndihmohet nga sekretariati teknik. Ngarkohen Ministri i Zhvillimit Urban dhe Turizmit dhe Ministri i Punëve të Brendshme për ngritjen e sekretariatit teknik dhe

përcaktimin e përbërjes e të mënyrës së funksionimit të tij.
Ky vendim hyn në fuqi menjëherë dhe botohet në Fletoren Zyrtare.

KRYEMINISTRI
Edi Rama